

連雲書屋存稿

連雲書屋存稿卷五

益州 焦和生 琴齋

謁南嶽廟二首

爲朝衡嶽到南天，纔汎清湘入眼先。
雲際祝融峯獨聳，日邊夏禹字長懸。
地當軫宿雄方鎮，神號朱陵壽大年。
九拜焚香虔默禱，芙蓉七十二爭妍。

規模宏敞氣清幽，廟貌尊嚴萬古留。
幾代豐碑排廣廈，參天老樹擁層樓。
澄懷欲赴登臨約，望眼難窮汗漫遊。
歸去鄂城應入夢，羣仙引我到衡州。

禹碑詩

我昨來謁衡山神一宿曾留祝聖寺

衡山下寺名

中峯欲上

阻陰雲寶山空回嘆俗吏潘侯

衡山令名煜浙江德清人

贈我墨本

碑道是岫嶠神禹字拳蚪倒薤雜苔蘚龍書螺螄逞奇

異上古結繩不可知周秦以下無此器夙昔傳聞今始

見河圖洛疇共珍祕形姿曾詠劉郎詩搜索還下韓公

淚至寶顯晦有天時人力所爲安可致嘉定蜀士刻夔

門厥後湮滅與俱棄不有好事張季文後人焉識希世

瑞

志稱禹導水功成刻石衡山岫嶠峯昔樵者見之宋嘉定初蜀士因樵者引至其所以紙打碑凡七十二

字刻之夔門峽中隨俱亡明僉憲張季文自長沙得之云是宋嘉定中何致子一摹刻於岳麓書院者皆蝌蚪文字凡七十七字不可曉碑旁小書內三字剝落至明嘉靖初國子生沈鑑自謂能辨其文因爲釋義云云升菴博古作長歌考据詳核傳盛事

志載張季文得碑墨本於楚以授楊

慎慎號博古其釋註必有所本云云又載慎隅碑歌古詩一篇謹知如氏明德遠承帝

翼輔唐虞治洲渚與登鳥獸門參身魚池鮮平地八年

忘家宿嶽麓焦勞胼胝殫神智念茲在茲求安定華嶽

泰衡罔不至疏導成民還事神山川柴望伸祭義羸塞

昏徙水患消南暴昌言衣食備陳常時夏萬國寧竄舞

永奔無餘累

自承帝句至此卽釋文大意

當年祀嶽宿齋宮蒼水使

者來夢寐金簡玉牒傳治法神之所命皆天意元圭告
成碑紀功勒石山巔示不墜篆法奇古氣若生鸞鳳龍
虎恣遊戲萬八千丈到者難七十七字跡深閱歐趙集
古金石錄偶因地遠未覩記周原石鼓半殘缺秦碑無
字空標識豈若此碑無間然三家釋註通妙思楊慎沈
鑑楊時
喬俱有釋文但時喬與
沈楊有十餘字不同耳攜歸鄂渚壯氣色黃鶴山輝江
水媚公諸同好賞其奇開拓見聞誇等類裝潢法帖重
樊鼎羅列屏風走魑魅不負衡湘此一遊逢人稱說良

綱領

壽嶽全圖歌

潘侯贈我岫嶠碑副以壽嶽之全圖九千餘丈撐突兀
七十二峯列清癯我從鄂渚趨桂陽南過洞庭泛瀟湘
江流宛轉時隱現山勢懸延看渺茫歸來欲上衡嶽頂
烟霧層層鎖嵐影名山入眼未登峯欲去留連心耿耿
感君惠我山圖全恍然坐我湘帆船九向九背觀不盡
卧遊豈患埋雲烟迴雁峯名爲頭岳麓峯名足屏嶂碧岫峯名
遙相屬衆峯環拱祝融主峯名尊羅列兒孫受約束就
中紫蓋獨不朝紫蓋峯名凜然爭長逞雄豪青岑白馬二峯名

競奔赴石廩石囤

二峯名

占豐饒

志稱石廩峯形如倉廩有二戶一開一闔闔則

歲豐開則歲歉

朝日喜陽

二峯名

近中峯碧蘿天柱

二峯名

接芙蓉

峯名

朱明赤帝烟霞

三峯名

映天臺華蓋雲龍

三峯名

從其餘

五十一峯奇霞蔚雲蒸森陸離瑞應曾來鳳鳥巢

鳳凰峯會

有鳳來集

佳氣還產珊瑚芝

華蓋峯座靈芝

吾

皇秉道化成久包羅乾坤育九有嶽瀆効靈純嘏長普

天咸頌南山壽小臣策名三十載西歷華岷南嶺海披

圖願獻壽嶽歌萬歲千秋永不改

登岳陽樓

獨上層樓眼界寬
洞庭青草湧波瀾
長江浩蕩千流匯
天嶽蒼茫萬點攢
門泊帆檣饒過客
地當衝要得奇觀
竭來信宿憐鴻爪
爲愛湖山遍倚欄

歇心處題諮餘錄詩冊後用吳宗伯韻二首

蕭寺留題古香光
姓字喧心從塵外
歇墨向腕中翻星
使頻歌曲皇華總紀

恩琳琅詩一冊焜耀映山門

佛壁紗籠滿詩傳
萬口喧心隨明月
淨筆共雨花翻後
起追前輩新遊述舊

恩詔餘遺刻在珠玉鎮空門

中元夜登黃鶴樓觀河燈

壬申

江城明月圓新秋城西燈影江中浮觀者紛登黃鶴樓
我亦乘興來盤遊燈光月色鬥清景玉宇瓊樓揭淒冷
金波穆穆天無風葛袖翩翩人對影江心燈火泛樓船
撞鐘伐鼓驚龍眠幢旛寶蓋緇衣集祈福拯厄運燈燃
須臾驪龍盡吐珠湘妃漢女羣歌呼星毬燦爛鄂渚側
火焰騰擲晴川隅忽憶昔年京國裏

西苑讎書傍秋水中元佳節看孟蘭徹夜光芒嘆觀止

昆明湖上月色新垂虹橋邊多麗人朋儕踏月尋燈處
吟詩唱和何清真回首流光廿六載月轉星移川到海
當時此夜觀燈者屈指還餘幾人在同年張石癯王荔園輩皆作古人矣
沈吟往事淚沾衣興盡更闌我欲歸樓上蟲聲如送客
水邊燈影尙留輝歸路夜深街鼓靜城頭烏鳥棲皆定
屢跋紗籠絳燭枝仰看孤月當天正

鄂城中秋月下對飲用東坡夜字韻

去年翫月在燕山對酒旅亭遣良夜今年鄂城見月圓
官况蕭條香閣下時寓臘脂山下之護國寺人事盈虧隨月轉客中

壘塊仗酒瀉少年豪放心猶猛老境衰殘氣漸亞江上
白鷗可常狎仙人黃鶴誰能借猖狂何用效嵇阮風流
不妨同庾謝相逢且莫泣楚囚舉杯儘教話僧舍平生
焉得順風羽甘苦要學倒餐蔗經時勞碌身雖慣過眼
波濤夢猶怕今夏湖南桂陽之役備嘗艱苦並因暴雨山水陡漲屢遭波濤之險四年浪
遊久不歸妻孥憤恚從怪罵

送王方山觀察歸蜀中守拙草堂

方山瀘州人
乙酉孝廉

方山先生蜀邦彥少壯文名動鄉縣凜然步趨古聖賢
不與時俗同歆羨登科筮仕垂卅年到處惠愛人爭傳

爲政早登名宦籍守道不讓前哲先歷膺煩劇州與府
召杜龔黃齊治譜旋因掃除豺虎功

恩旨晉擢薦繡黼十載驄馬巡安襄無人不識錦江王
撫綏績勒峴山石冰玉節肅洞庭霜邇來歸田遂初服
嘉陵江上結茅屋秋風儘鱸張翰鱸曉霜聽採陶潛菊
青燈蓬蓽課諸孫由義爲路禮爲門大智若愚大巧拙
愈見先生道德尊我昔持節使成都夢魂舊繞浣花隅
此邦山水如好友助公詩興添清臞三春海棠開畫錦
竹徑松牖容高枕琴樽隨意娛耆年栽嶠仙人來共飲

林下優游樂事多，機心盡豁完天和。古來全福似公少，
香山洛社應同科。料知蜀都人士異時徵，文獻定當載
酒草堂就訪今日之東坡。

陪鮑雙五學使渡江遊武昌西山諸名勝

黃州作

學士清遊今古同，武昌不隔一江風。樊山寒水尋坡老，
石臼窪樽訪浪翁。徃日名賢皆過客，人生宦迹等飛鴻。
偶來載酒追星使，乘醉登臨氣倍雄。

移居蔚園公寓

時癸酉冬日

舊日知章宅

故方伯賀公舊宅

流傳更幾年，樓臺高甲第。城市

得林泉地僻塵囂靜心閒野趣偏此間容抱膝鴻雪有
前緣

怪石攢山古孤亭拔地高池軒開秀爽竹樹列周遭到
此神全曠相看氣倍豪幾年空俗客一日欲抽毫

古栢蒼松下濠梁夾鏡清篁烟籠慘淡桂影印縱橫當
暑雲常在高秋月倍明築居逢此境不異小蓬瀛

老屋攤書穩蘭交雅誼多

劉澄齋同年留贈

新知初洽比舊雨

更磋磨

地接糧署隣近朋好甚多而紀香谷同年亦寓對門晨夕過談甚歡

步月談懷暢

篝燈載酒過異鄉愁思減浩蕩養天和

指日寒梅發春晴好鳥歡名園憑眺賞勝侶集杯盤縱
飲胃襟濶吟詩眼界寬澄懷真自得終日倚闌干

題巴益齋方伯引杯看劍圖

益齋奇氣天所生光芒萬丈心崢嶸倚天長劍貫牛斗
誓與人間平不平幼學三冬富書史文章經濟能專精
壯年宦吳歷名郡虛堂懸鏡壺冰清鋤強扶弱去非種
佩牛帶犢勤春耕大才更須盤錯見佐戎南楚殲蛟鯨
蝨蠻殄滅荷 寵錫高冠孔翠 頒天庭繡衣持

斧作直指霜威露澤流湘衡南移滇中秉臬事東還吳

下司明刑飲和食德遍遠邇召棠郇雨傳歌聲竭來旬
宜蒞鄂渚春風和氣涵江城當機能斷利鉞刃干莫騰
躍驚雷霆嗟余鉛刀愧鈍拙喜逢淬厲垂眸青公餘把
酒話心曲森森寶氣新磨礪照人肝膽率本性襟懷磊
落全真誠琴軒月夜聽吳詠書堂花徑觀春星平生深
慕浣花老許身稷契非矜名元龍豪氣高莫敵李白俠
骨眠常醒莊生說劍豈足羨龍圖胷原饒甲兵佇看建
牙開府擁節鉞還擬醇醪百斛從君傾

重遊武昌西山

疊去歲韻時因公
赴興國州經此

再訪西山逸興同攝衣高閣聽松風僧來相引尋前夢
客是當年舊醉翁去年十月曾陪鮑雙五學使來遊小
飲松風閣大醉而歸蓋余前署黃州
道象日冷寒溪催霰雪江搖赤壁認泥鴻平生梗迹真
難定到處題詩且自雄

武昌懷古

武昌古邑臨江側江濤洶湧限南北西枕樊山對赤壁
地利人豪真霸國孫郎當日此爭雄割據天險逞英風
曹瞞老去昧時務八十萬軍喪火攻伍胥解劍亭空存
元結杯飲無窪尊庾樓迴非舊賞地陶柳難覓城西門

惟有蘇家勝蹟多。至今兒童說東坡。寒泉久題菩薩銘。
春江還作西山歌。竭來信宿感今昔。徃古英豪悉陳迹。
剩有千秋萬歲不朽名。長與江山城邑爭烜赫。

大冶道中卽目

寒雲黯黯日陰陰。石磴盤空古木森。山似浮圖層刻角。
人疑渾沌少機心。崎嶇歷盡平途見。艱險經來覺悟深。
嗟我一生幽興遠。林巒佳處有知音。

雨行口號

水濶橋梁斷泥深。道路難戰兢。凌峻險。恐懼履波瀾。雨

急人衣溼風侵馬首寒回頭顧僮僕顛倒據征鞍

興國留別作

六夕宿下雒一朝還鄂州江城霖雨溼街市如膏汕凌晨踏溽行朋儕勸淹留臘殘不可住道左聊停騶握別各贈言臨歧愈綢繆教我慎風波諄諄古渡頭天寒務加衣休惜敝貂裘計程五日間早登黃鶴樓嗟予感此語不覺添離愁自笑迂拘性動輒拙身謀率真復任情恥與俗沈浮得失信天定傲骨輕王侯歲寒不畏風水急常乘舟以茲處塵寰悠悠六十秋此行藉公事樂與

諸君遊况復歷龍山兼臨富川流百疊訪謝公墨池憶
鍾繇孟嘉與伍胥憑弔皆有由甘寧暨東坡往蹟渺難
儔總之英雄人時俗迴不侔宦謫偶經此千年仰仙洲
人傑地益靈山水增清幽我來暫憩息何幸追前修人
生真若夢天地一浮漚泥鴻留指爪隙駒一轉眸冬盡
揮手別明春再相求

興國歸途卽目

繞郭羣山古不青雨餘微冷乍成冰路經妍日乾還滑
馬惜障泥走欲停好友臨歧情捲戀朔風吹面氣清冷

此行差愜持平願不負辛勤作使星

出城一路絕纖塵樹色青青麥脚新到處冬暄歌愛日
幾家歲晚望初春五年遊宦家山遠千里風煙跋涉頻
行住心情本無異星移物換肯傷神

旋鄂城作

衝寒冒雨馬蹄忙半月馳驅返鄂陽湖水江流隨步轉
龍山鳳洞計程長

赴興國路沿江傍湖龍山鳳棲洞皆州中名勝

平情聊喜波

瀾靜折獄難矜聽斷良可嘆歸裝殘臘盡敝裘猶帶十
宵霜

鹿門紀程詩

黃鵠磯邊喚渡舟，漢陽城裏易驂騑。只緣颶母驚行客，

驛館蕭蕭一夕留。

宿蔡店

郵亭夜雨對孤燈，客況無聊果似僧。待得天明愁踏渾

滿空寒氣欲成冰。

蔡店道中

武美山頭百戶烟，龔家渡口泛孤船。貪看兩岸巒光好，

嘔啞聲中入漢川。

自漢陽入漢川

滌洄水抱漢川多半日，行程七渡河一勺。細流何足道，

使君曾見海天波。

漢川道中

長江坡館最蕭條應客無人驛路遙夜半行裝催不到

烹茶煮粥度寒宵

宿長江坡
應城縣界

應城山產石膏多絡繹奔馳細馬馱十雨五風催麥腳

偏饒地利與天和

應城
道中

路到潘場驛館荒山村茆屋日蒼黃呼童洒掃庭堦下

一夜安眠攤飯床

宿潘家場
京山縣界

京山山勢極崑崙曩時麥腳饒海外故人難握別

繫維今夕憩官橋

符令其珍瓊山人余守瓊
時門下士也凡夕住官橋

嶧峒山邊大道東山形條亘望難窮楚王勝蹟今何在

空說當年舊郢中

安陸道中

昔年曾詔陽春曲此日還留興獻墳一宿郢中思弔古

幾多舊事付傳聞

宿鍾祥縣

龔家集上市烟多臨水登山引醉哦忽有風雷次急雨

飛鴻爪踏樂鄉河

宿豐樂河鍾祥縣界

豐樂朝行廿五程渡襄路入郭河營晚來一夕宜城住

卅載同年話舊盟

宿宜城縣邑令龔蘭芳廣西人予丁酉科同年

宜城向曉促行裝近水寒風分外涼一路好山觀不盡

雪花送我入襄陽

由均州遊武當山卽目

均州一路踏雲行
太子坡邊聽水聲
冠絕詩人風雅語
武當頂上過清明

陡峻先經好漢坡
南岩仙蹟古難磨
茫茫白氣看雲海
笑煞岷江錦水波

黃龍黑虎已難登
五老仙橋力不勝
未到朝天雙足怯
可能直上最高層

騰身三度陟天門
萬丈懸崖斷客魂
賴有僕童扶掖好
幾番推挽到黃昏

路到天池日已斜
形神疲憊眼生花
皇經堂畔登樓宿
半斗窺窗月映紗

清晨齋戒謁元宮
步上天樞第一峯
玉寶金身眞萬古
英靈赫濯壓羣宗

摩挲僊跡幾徘徊
上界何時得再來
峯轉路彎山木合
回頭雲霧隱樓臺

歸去應誇汗漫遊
名山到處是仙洲
休稱五嶽聲聞大
晚出應誇第一流

武當山雲海歌

武當名勝齊岱嵩磅礴元氣涵鴻蒙石磴盤迴九千丈
突兀天柱何蒼窿俯視濃雲一片白茫茫大海無西東
是雲是水誰復辨潮來潮去天河通羣山倏出倏復沒
髣髴銀海翻魚龍須臾微露山一角又似孤島生濤中
杈枒古木霧靄裏萬檣林立凌蒼穹凝眸不覺雲色變
落日返照穿層空塵埃野馬迭隱現蜃氣樓臺雜青紅
千態萬狀罔不有恍惚海市呈神工腐儒拘墟寡聞見
焉知地形難窮嗟余枯朽將耳順奔波虛擲年忽忽
壯歲岷華歷郵傳前年衡嶽窺諸峯北醫巫閭南五指

匡廬恒霍空青瞳如此大觀豈易得詎料邂逅開心胃
敢言片誠動元嶽或是山鬼矜龍鍾平生一快萬里志
世羅手頓忘萍蹤山靈引我作知己入筆相助詩清雄
人生所遇皆夢幻佳山佳水難頻逢飄蓬斷梗共浪跡
浮雲身世隨天風

宿玉虛宮和王荔園同年壁上韻

我朝元嶽歸途中冒雨來宿玉虛宮石磴溼滑歷奇險
回望山頂烟雲蒙道士殷勤具茶果爲言神應純天工
昭靈顯赫重前代不減漢武聞呼嵩近歲英威走賊盜

彌天黑氣傳老翁

南岩老道具說白蓮教滋擾時欲據山頂忽見黑氣彌天寸步不見驚懼

而羣山四面漸平遠展旗背枕開奇峯題詩塵壁憐舊

雨感懷今昔難重逢

荔園觀察詩係癸丑冬赴武當經此所作今不勝人琴之感矣

均州行

爲捐賑紳士作

遊嶽歸來但酌酒胷中壘塊復何有昨日冒雨辭仙峯
今日乘風別均口均口人士淳良多人和自爾邀天和
風清俗美可立致型仁講讓相觀摩憶昨我到均州城
愁聽鴻雁哀噉聲稱貸乞糧豈得已鹵莽未免太紛爭
我覩此情心不忍爰集紳民共汲引金錢勸施五十千

人人踴躍各慨允我愛此地人情好患難扶持肯相保
從來厚德致休徵佇見麥豐稻熟早遠村士子亦健羨
聞風激勵卹鄉眷莫謂陋邦化難行民俗從茲一丕變
舟行念此心神怡片帆安穩中流馳人間善行豈可泯
浣筆襄水題新詩

舟中卽事

峴首參差一望間漢江縈帶曲如環海濤觀罷難言水
嶽頂遊來不愛山

新自武當山歸

野樹青青村舍映虛舟汎汎

客心閒梗萍蹤跡浮生夢逐浪隨波到處灣

衆山羅列錦爲屏草色遙連麥浪青來往雲帆湖海客
高低烟樹短長亭卅年辛苦催蓬鬢萬里奔馳作使星
一事無成今老大江風吹斷夢魂醒

立夏日感懷

轉眼殘春付逝波一年花事任蹉跎三千客路風塵遠

九十韶光閱歷多

自前二月初由鄂赴鄖防邊歸來又赴安荊路經三千餘里

禦侮

無才憑地險撫綏有道賴人和

禦隣氛撫饑民皆得平善

翛然剩得

天機在對酒開懷醉且歌

忽忽春去夏初來風日清和絕點埃梧樹陰籠雙栢聳

楸花光照一庭開
荒園半畝供詩嘯
茅屋三間任草萊
聊託蘧廬留信宿
無多求亦自悠哉

醉後放歌

讀書不願爲俗儒
作宦豈甘同俗吏
每於時事仗肝膽
不顧當場犯諱忌
中外趨公三十年
書癡面目如從前
但將真率保故我
何計名利能兼全
邇來遠遊到楚北
知雄守雌白守黑
常懷伯樂知遇恩
不覺英姿露本色
一生最愛理不平
心胷老去仍崢嶸
丈夫磊磊落落寧
玉碎豈肯僥倖瓦
全湮滅而無名

連雲書屋存稿卷六

葢州 焦和生 琴齋

蕉園中丞奉 命撫黔道經襄陽過訪并以手畫

蝶扇屬題勉賦二律以應

秋曹十載挹春風江左旬宣譽望隆幾代簪纓經術湛
九重倚畀國恩崇邇來旌節開南極更喜蓬茅過玉驄
身貴無忘憐舊雨果然德盛禮謙冲

擁節南來夏正長仁風遠播送清凉滕王畫蜨稱神品
子美題詩敢擅場閩海至今留德澤蠻疆從此變循良

書生濡筆書新績絕域遙聽化俗方

題楊蘋村同年旋軍圖七古一章

雪溪名士天下傑大智若愚大巧拙少年讀盡萬卷書
文經武緯雙奇絕青選筮仕來鄴陽妖氛蠶擁連荆襄
慷慨奉檄效馳走轉餉十萬供饌糧當陽豺虎如雲屯
欲戰先守荆北門河溶慈化固保障鄉兵五百防狼奔
主將下令破殘賊大軍無數集東北獨當南面委書生
頓使英雄逞本色先生意氣倍超忽奮不顧身先士卒
長坂坡西設伏兵義勇三千屢衝突執訊獲醜聞 彤

庭宸章睿藻輝天星小臣感恩思報國
舉旗斬將驅風霆白波黃巾咸授首
競說楊家兵未有羣兇畏威鳥獸散
戢戈櫜矢淨刁斗凱旋高唱大刀環
驃騎將軍鬢未斑回首八年辛苦意
裹尸馬革征衣殷傳神聊託畫師筆
南山飛將應同匹漢陰吏隱自灌園
國士誰知君第一我與先生共蘭譜
卅載神交快親覩披圖觸我平黎功
磊落襟懷欲飛舞

甲子春予守瓊南時崖州黎人不靖督兵往勦凡四閱月

藏事攻撫並施全師而還

隆中歌

四月之望城西陬沔漢江上祠金牛萬山以南風景幽
相與乘興隆中遊隆中一去三十里古寺茶話停鳴騶
行行漸入塵外境雲巒四面圍丹邱丹邱絕頂烟浮浮
彷彿蓬島同瀛洲爲問當年廬此者南陽諸葛居山頭
布衣躬耕自樂道聞達豈肯干諸侯何人品藻薦賢哲
司馬水鏡殊凡流先主求賢信若渴草廬三顧勤諮諏
初見數語鼎足定君臣魚水真難儔跨有荆益觀時變
和吳拒曹深運籌赤壁破賊功第一嚴峻治蜀恩威優
厥後白帝受遺詔忠貞常抱偏安憂渡瀘南討七擒縱

天威心戰攻蠻酋北圖中原屢決勝出師二表傳千秋
親賢遠佞望後主鞠躬盡瘁光前猷祁山六出斬賊將
街亭一失非人謀頓使仲達畏若虎風雲魚鳥護旗旂
奈何天運移漢祚事煩食少身難留卒爲魏帥所意料
甘受巾幘能包羞五丈原空將星落八陣圖在神鬼愁
英雄長下弔古淚大名字宙欽伊周我來山中訪十景
抱膝石籠江雲稠冒襟澹遠本洙泗陰森古栢連田疇
低徊顧戀不忍去斜陽滿地催騏驎回頭歸路林壑隱
晚烟漠漠迷襄州

周達夫邀遊張公祠習家池晚登九宮山醉後歌
周子邀謁張公祠醉後還臨習家池谷隱寺中偶憩息
九宮山麓觀銘詞山名九宮亦號龜陟巘蹕蹬天風吹
絕頂望江源委見城郭烟樹羅參差襄樊萬戶映沙嶼
漁舟幾點相追隨無邊野景只一覽滌盡塵垢開襟期
憶昨我遊武當頂羔裘御寒雪染髭山冰未消雲作海
人間天上風光移轉眼節物變長夏絺衣飄飄白羽麾
相去纔隔七十日炎涼世事非前時人生對酒且盡歡
道士不厭羣書癡莫愁身作異鄉客入手且酌鸚鵡卮

酒酣耳熱樂忘返峴山落照江心垂晚風催詩吹夢醒
燈前把筆成新詞

舟行卽事四絕

襄江五日盪輕舟鄔郢長林任去留纔過竟陵經沔漢
計程信宿至西樓

夏日微涼夜景清無邊水色一舟輕長年打槳乘風去
和霧和烟傍月行

一官泛泛久奔波過海浮江屢渡河斷梗飄萍成底事
空餘老眼閱時多

獨坐扁舟醉詠詩
胸中壘塊酒澆之
若行三萬六千日
不是詩仙定酒癡

將至鄂州寄懷蔚園

蔚園風景邈何如
四月長離憶故居
近市樓臺覆座網
滿庭竹樹沒蓬廬
名花絢爛誰詩酒
池水清涼剩鳥魚
無限韶光虛擲過
歸來覩物一愁余

憶昨春初冷未消
園中積雪沒平橋
牡丹根嫩芽猶短
寒玉枝稀蕊尙嬌
轉眼紅榴知結子
應教綠桂聽鳴蜩
交涼屢換人顏改
羞對吾廬嘆寂寥

還至鄂城作

四月駐鄖襄一朝旋鄂州節物異寒暄人事殊樂憂憶
我趨鹿門邊境紛戈矛哀鴻遍四野環向祈懷柔任重
虞綆汲蚊負常生愁兢兢以自守惟恐招愆尤天公鑒
愚拙隨處逢安流妖氛卽日淨饑黎應時收安然返故
廬撫躬心日休所得亦良多意外非謀求丈夫貴達命
行止凜包羞回念守襄事老氣橫九秋

自鄂赴黃州道中作

自笑迂疎百不能性耽稽古志峻嶒平生宦跡追坡老

半世吟懷學杜陵
儋耳珠崖談指馬
錦江玉壘看雲鵬
竭來重踏黃州路
喜見西山爽氣澄

自號懷坡山人

少年愛讀大蘇集
終身慨想其爲人
滿腔忠義貫牛斗
清風峻節完天真
平生文字動神鬼
筆墨未到氣先吞
雪壓峨眉高太華
河瀉星宿傾崑崙
殘章斷藁重拱壁
飛鴻泥爪留精魂
大名千載照汗簡
奇才萬古光乾坤
嗟予嗜古思尙友
何幸徃哲遺清芬
壯歲奉使入巴蜀
眉山風韻欽前聞
嗣度嶺嶠守瓊海
儋耳親歷枕榔村

洞酌乳泉思惠澤負瓢戴笠傳餘醺到處咸誦坡老美
馨香俎豆凌天雲笑我後公七百載萍梗胡爲不離分
我年與公皆丙子無乃臭味投蘭薰竭來承乏齊安路
邂逅又結先生因春晴看花海棠院秋夜翫月長江濱
武昌西山近咫尺雪堂赤壁臨城闌此生追隨信有數
異世同憐駒隙身詩酒感懷夢想見飄飄仙骨超凡塵
二賦堂高懸日月廉頑立懦真如神自號懷坡辨香永
英靈或許常相親

翁覃溪夫子蒙

恩賜加二品銜重預瓊林筵宴賦詩四章恭紀書來命

和敬步元韻錄呈

昔年蓬島舊仙班今日重看矍鑠顏

錫崇銜爭健羨

丁卯鄉試已重赴鹿鳴宴恩加三品銜

再登瓊宴寵難

攀風流藝圃傳佳話瀟灑詞壇養退閒
喜得門墻桃李樹楚江翹望筆如山

淵源經術仰眞傳獨擅巍科六十年
學度金針文蔚煥

才衡玉尺士超遷

師通籍後歷官清顯任廣東江西山東學政典江南順天湖北鄉試得人

最盛現麗笙相國礪室尚書皆出門下

洪都嶺嶠留泥雪鄂渚滄溟染翰

烟此日前賢聯後起青雲白髮映賓筵

典試春官弟子行就中國老大文章當年同榜人誰在

座上羣英姓未詳定有孫枝分序謹應知晚進勸杯長

興來乘醉吟詩好秋菊春蘭費較量

師原詩注壬申會試榜在九月今始

得預春
間筵宴

曲江風日最堪憐拜罷紅綾

御讌前早荷

殊恩欽曠典

謂重宴
鹿鳴

遲邀

君賜識臣虔

師於辛未科卽應重預此宴當時親友多方勸駕而堅不肯出者蓋以未申尙隔一

年不願假借故遲至今科已越二載
始出正所以示敬
上之禮也
榜周花甲科三十

壬申至此
已廿九科
人比靈椿歲八千自笑彭宣違絳帳重筵預

讀紀

恩篇

自鄂歸黃謁蘇祠懷古

鄂渚歸來夕照紅
心儀往昔謁蘇公
祠高赤壁雲峯壯
江繞黃州地勢雄
西嶺寒烟蒼翠裏
東坡古迹滅明中
山川依舊人誰在
獨對斜風數晚鴻

雪堂觀雪歌

去歲三冬苦無雪吟詩憂旱過武昌今冬黃州雪屢見
爲看瑞雪來雪堂此堂創造始何代眉山蘇子傳芬芳
當年雪中成結構四面雪景羅山牆往來臨臯遊赤壁
攜客憩息傾壺觴世遠移建失故址嘉名千載人難忘
嗟我登此一顧盼山川風景非尋常西嶺寒溪冰雪裏
安國定惠遙相望大江吐吞白一綫羣峯積素雲茫茫
江村林木半隱現漁舟沙嶼交低昂歲寒天晚人物靜
板橋野徑空蒼涼觀罷曠然若有得飄飄兩袖生風霜
主人快意我心喜茶話相對情懷長人生到處貴盡興

江山入眼增詩腸昔年鴻雪今尙在坡公餘韻真徜徉
歸來對雪酌大斗一醉春夢迷黃梁

六十自壽歌

人生六十花甲周眼昏齒豁霜盈頭少壯心事今已矣
斜陽晚照空悠悠回思往事儼昨日如夢初覺纔開眸
自昔十年始就學十五勵志從師遊十八黌宮采芹藻
廿一青選拔其尤廿八題名綴虎榜廿九釋褐登雲樓
丹筆題詩青瑣闥珊瑚網羅材錦江流旋由倉曹擢儀部
嶺海遠守珠崖州七年蠻烟瘴雨地刑平政理施懷柔

島黎滋擾梗王化四月攻勦興戈矛鋤莠扶苗靖邊境
廓清藏事功優優爲念將母思故里漂搖萬里還林邱
事親三載終養葬出山雲復隨風浮竭來楚水泛萍跡
四年飄泊憑夷猶此日齊安持繡斧民淳事簡山川幽
詩酒遣懷頗自得况多古蹟遺前修月波竹樓盡清境
蘇黃餘韻堪勾留春暄安國看花竹夏雨聚寶尋琅球
赤壁秋清賞明月雪堂冬暖消閒愁寒溪西山一水隔
乘興約客撐虛舟江山如此足娛意優游卒歲何所求
回首故鄉不可見此間邱壑眞仙洲餘年便爲黃州老

南冠何妨同楚囚官閒志定身益健精神矍鑠心休休
服食靈藥飲美酒逍遙日月經春秋他時有人疑年間
甲子定引絳縣老者爲同儔

奉和錢竹西明府見贈詩元韻二章

竭來持斧楚江湄獨凜冰心誓不私性僻平生成拙宦
交疎冷落少新知蹟慚趨步尋坡老

來詩有半生宦跡東坡並之句功

愧貪天靖島夷

來詩贊余平黎事

經濟文章雙未就耽吟只賸

幾篇詩

羨君披霧授天材勁節凌霄大氣培治比文翁全蜀化

詩成杜老盛唐開
燕山舊雨追前夢
楚水新萍許共陪
來詩念及馮魚山
房師陳梅垞
同年又近刻有楚江萍合詩集
從此題襟聯漢上詩筒
酬唱去還來

遣懷

平生宦迹歎忽忽
駒隙鴻泥到處同
萬里家山遼海北
幾年萍梗大江東
黜名未立身先老
學業無成髮已童
剩有迂疎違俗意
南冠愁對楚囚風

暮春二日舟行記程詩

時奉檄監兌
武黃漕米

揚帆春暮發黃岡
隔岸林巒望武昌
江水清連村樹暗

麥苗嫩映菜花香和風淡蕩舟程穩行色倉皇客思長
春屬卽日到署以公務不得佇候一見纔過巴河天已晚蘭溪夜泊話淒涼

濛濛夜雨到天明舟子愁風不肯行

次日係真武暴期

好語殷

勤催棹轉連檣欵乃放歌聲岡經黃石園林盛磯過觀

音嶺岫橫

黃石岡觀音磯皆大冶縣界

道士泐臨西塞近水光山色

接雲平

四面峯巒一葉舟村雲岸樹映江流春風嘯拂天邊坐
烟雨蒼茫望裏收半點浮塵真不染滿腔清興足消愁

山林城市原霄壤快煞書癡汗漫遊

兩岸雲山入眼青隨波逐浪棹無停不寒不暖神偏爽
和霧和烟酒乍醒興到常流機浩浩心閒那覺鬢星星
黃昏舟泊蘄春宿舊雨重逢話楚萍

署蘄州牧張君
本舊相識也

舟中卽目

清空山色滴人衣漫遠林烟聳翠微霽日開時屏畫展
好風吹處錦帆歸潛心密詠塵懷淨放眼遐觀逸興飛
我本平生多野性狂吟真與世情違

半晴半雨好春光近水遙山入眼長酒盡一杯宵洒落

詩成數首興蒼茫連雲村樹臨江綠隔岸林花映葉黃
帆影棹聲人雜遝乘風來往趁斜陽

暮雲疎雨隱青山都在空濛霧靄間浪靜波平江路濶
帆懸風正櫓聲閒水連湓浦尋衣帶地接廬峯見髻鬟
飽領烟霞心目曠歸來好送晚春還

岸上人聲水上船江光山色境如仙紅塵一點何由到
青眼千秋自洒然奇絕恍遊瓊海島清虛似入武當天
去春遊香爐瀑布無多路雲錦還看南斗邊
武當山

當年策馬使羣叢蜀道山川入眼中豈謂楚萍乘遠浪

還將漢節御長風
衡陽枕聽三更雨
湘水槎浮九轉蓬
半世清遊成短夢
高歌眞作信天翁

晚烟籠月景分明
喜見江天雨後晴
遠近山光紛錯落
高低樹色望縱橫
離情拚與蠶絲盡
客夢常隨蝶影清
斷梗飄蓬難預定
征帆何必數歸程

年年穀雨苦連陰
旅况蕭條白髮侵
生恐麥田傷澇甚
愁看蠶繭被寒深
行帆畏溼羣停棹
好鳥知風早避林
獨有孤舟江上客
撫懷常抱感時心

此同下首爲江上苦雨作也

纔見晴明雨又昏
虛舟久繫客中魂
山經重潤濃添黛

江納羣流漲起痕十日空留鴻雪跡三春坐耗水雲村

明朝解纜潯陽去好叩柴桑處士門

住田鎖十日來朝將赴九江也

武穴侵晨撥棹行順流俄頃到龍坪千家烟樹臨江暗

一片雲帆照水明久雨天晴人意爽好風日暖鳥聲清

桐花遙映楊花白兩岸春光入望平

此同下首自武穴至江州作也

烟光樹色撲眉青何處塵氛得暫停山看廬峯名勝地

人來漢水使臣星庾家樓閣江臨檻白傅琵琶月滿亭

且泊征帆隨去住寄懷詩酒醉還醒

江上送馬錦園歸觀

潯陽江上別君歸此去龍眠舞綠衣握手方欣三載好
到家已悵五年違堂高萱草春暉永庭茂芝蘭玉樹圍
想見慈顏歡聚處精神老健興遒飛

早發清江訪廬山夜宿天池寺二首

輕帆曉挂渡潯陽爲訪匡廬興欲狂雙劍凌空天外聳
九峯環秀日邊長嘉名古說香爐勝清照人傳石鏡光
誰料浮槎星漢客偷閒亦到斗牛傍

路過東林三笑亭石門西去白雲經

白雲峯下有報國寺道緣佛

法通仙界

去凡禪師遺徒前引

身到天池識地靈丞相塔前看朗

月丈人峯畔數晨星平生快覩廬山面一夜泉聲倚枕聽

遊廬山宿天池寺贈去凡禪師

我愛匡廬山真面初未識渴慕四十年魂夢忘不得廿載赴嶺南經此烟霧國遠望雲水間奇秀終難測惆悵增浩嘆空懷翠屏色何意持星節來斯清曠域公務簡且閒得暇暫游息清晨渡潯陽遠山淨如拭纔過烟水亭旋看濂溪湜煎茶佛華山香爐剛近逼古林過東西三笑虎溪側石門吼瀑泉白雲峯挺特禪關曰報國離

垢崇靜默見我如故交方丈具齋食遣徒作導引登峯
未昏黑重感慈悲心深得扶持力山頂夕陽晚日落難
攀陟俯瞰天池深遙望孤塔直聚仙古亭旁松蔭雲似
墨星排碧落寬月照石壁仄凌虛文殊臺咫尺分南北
恍與羣仙遊周流窮八極匡君不我棄樂極心惻惻仙
境豈常到別後定相憶何日再御風重與遠公卽

由天池峯遊御碑亭佛手巖

清晨別天池蹭蹬下高嶺迤邐東北行數折離絕頂老
松纏石幢初日照嵐影遙望御碑亭巍煥壓奧境聞是

明祖開

誌載洪武年間帝賜周顥仙詩並表其助國之功云

聖製體嚴整碑陰贈

仙詩記事句清警世閱四百年孤立蘿徑永常並廬岳
高不逐空山冷俯視佛手巖天造此幽景深洞大如船
指爪森勁挺恍似巨靈掌支撐施勇猛清泉滴石崖古
刻銘寶鼎中有接引佛高與此巖等山僧迎笑立烹茶
汲仙井四壁絕塵喧萬籟俱寂靜禪關真樂國扼要心
已領開襟俗慮忘放眼天地迴興闌我欲歸白塔尙延
頸浮生信若夢到處嘆萍梗去住鴻雪痕所貴無畦町
隨緣定逍遙過客只俄頃回憶昨宵宿悠然動深省

題江州方道昆太守茶山草堂落成詩

茶山先生古君子讀書設道莫與比省郎十載守江州
仁智性情愛山水心甘恬淡薄膏梁政尙和平絕奇詭
虎渡亭前傳茂績庾公樓下標五美

府堂名

公餘陶寫耽

吟詠匡廬眞面目仰止興來攜伴循山麓九疊奇秀淪
肌髓最愛白傅香爐峯當年結屋停杖几紙方橋邊選
幽勝白雲山底攬霞綺古木陰森禽鳥樂飛泉瀑布聲
盈耳此間溪壑擅奇絕騷人韻士應脫屣先生快然若
有得庀材諏吉謀經始寺僧去凡亦名士相與努力空

山裏數月堂成大功竣四方賢豪集於此登高賦詩欣
有託到此憩息蠟屐齒先生得暇輒一往逍遙拄杖散
步履稅駕高枕夢魂清萬慮消除心獨喜回憶陶謝與
遠永蓮社清風今尙爾我訪廬山半日遊快覩芳蹤情
何已歸來話舊對黃堂示我佳篇盈繭紙羨君仕學勝
蹟多滌我塵襟在彈指

題方道昆太守遊廬山詩後

道翁雲署交握別廿年久淶江重把晤一笑雙白首示
我遊山詩滌我塵襟垢樸茂而清俊得覩未曾有鮑謝

難擅長何論韋與柳浩瀚比韓蘇沈厚追杜叟具此磊
落胷大展迴瀾手披誦纔一過字字堪不朽芬芳滿齒
頰餘音常在口佩服誌拳拳題詩綴其後

自小池口陸程旋黃州留別二首

十日從公住小池此間風景繫人思江連湓浦誇名勝
山愛廬峯吐秀奇屐齒無妨登絕頂蒲帆幾度謁叢祠
訪廬山及海天寺諸勝境春光如許愁中過賴有長吟記里詩

終朝詩酒漫勾留對景攄懷得自由風靜江聲舟泛泛
雲連雨色樹悠悠來時麥脚青遮隴此日秧針綠滿疇

且逐殘春歸去也。匆匆馬首返黃州。

黃梅道中

昨夜送春春已歸。今宵迎夏夏方微。
離懷屈指三旬久。客路關心四日違。
滿目山川風掃面。長途跋涉雨沾衣。
到家休訝回程早。爲愛鰭魚出水肥。

歸至齊安

朝餐驛館渡巴河。風靜舟輕水不波。
隔岸山峯迎面熟。緣江村樹送陰多。
天長雨足農功急。地沃民勤節氣和。
春出夏歸時序改。

立夏至今三日

親朋話別樂如何。

由黃岡赴江夏道中作

清晨發齊安言就江夏道麥浪翻黃雲稻針映綠草遠
山疊叢翠湖水漾荇藻薰風颯颯來滌我塵襟好嗟予
悲行役衰顏客中老三春花事盡首夏清和了江干看
晴雲廬頂聽鳴鳥

近從江州
遊廬嶽回

登臨暫適意光陰歷昏曉

天地一指馬萬物皆爲小人生轉瞬間歡樂豈常保對
酒但高歌勿爲過煩惱營營後世名何足堪爲寶且舉
武昌杯烟霞自探討

是日宿武昌之新店

明朝登黃鶴俗慮一揮

掃

歸至黃州

殘月夜明鸚鵡洲蒲帆曉挂逐江流青山陽邏

俱地名層

巒出白虎

山名團風

地名古木稠兩岸清光眞入畫一天霽

色引歸舟晚來停楫黃岡渡赤壁雲生隱竹樓

錢竹西明府復疊前韻見贈二律詩中有贊余廬

山近作句依韻和答

輕帆破浪溯江湄入眼廬峯愜寸私半世萍蹤同夢幻
一春鴻爪結心知曠觀天地無窮盡平視高深忘險夷
流水行雲隨去住清遊到處詠新詩

君身信是濟川材，筆底天風手自培。
赤壁歌從紈扇洒，東坡詠向畫圖開。
近承贈遊赤壁歌題於紈扇又贈風東坡笠屐圖題蘇文忠公生辰詩
流嘉績循聲遠，詩酒清筵俊彥陪。
笑我塵襟駒影過，也曾乘興聽琴來。